

Հայաստանի Հանրապետության փաստաբանների պալատի ընդհանուր ժողովի

ՀԱՅՏԱՐԱՐՈՒԹՅՈՒՆԸ

10.02.2025թ.

ք.Երևան

Հայաստանի Հանրապետության փաստաբանների պալատի բարձրագույն մարմինը՝ ընդհանուր ժողովը,

Հաշվի առնելով այն, որ «ՀՀ հարկային օրենսգրքում փոփոխություններ կատարելու մասին» 12.06.2024 թվականին ընդունված թիվ ՀՕ-285-Ն օրենքի (ուժի մեջ է մտել 2025թ. հունվարի 1-ից, **այսուհետ՝ Օրենք**) համաձայն՝ փաստաբանական ծառայություններ մատուցող՝ շրջանառության հարկ վճարողներին օրենքի ուժով պարտադրվել է անցնել հարկման ընդհանուր համակարգ (պետք է վճարեն ԱԱՀ և շահութահարկ), ինչպես նաև փաստաբանական գրասենյակների կողմից անվճար հիմունքներով մատուցվող ծառայությունները ենթարկվելու են հարկման,

Նկատի ունենալով այն, որ փաստաբանական ծառայություններ մատուցող կազմակերպությունների և անհատ ձեռնարկատերերի կողմից վճարման ենթակա հարկը փաստացի բարձրացել է 6-8 անգամ (5 տոկոս շրջանառության հարկի փոխարեն հարկվում են ավելացված արժեքի հարկով (ԱԱՀ՝ դրույքաչափը 20 տոկոս) և շահութահարկով (դրույքաչափը՝ 18-23 տոկոս),

Ղեկավարվելով «Փաստաբանության մասին» ՀՀ օրենքի 9-րդ հոդվածի 1-ին մասի 3-րդ կետով և Փաստաբանների պալատի կանոնադրության 7.2 կետով.

1. **ՀԱՅՏԱՐԱՐՈՒՄ Է, որ** Օրենքի կիրառությունը՝

- Հակասում է ՀՀ Սահմանադրության 1-ին հոդվածով հռչակված՝ Հայաստանի Հանրապետության իրավական և սոցիալական պետություն հանդիսանալու սկզբունքներին.

- Էական բացասական ազդեցություն է ունենում քաղաքացիների և իրավաբանական անձանց խախտված իրավունքների պաշտպանության վրա.

- Ըստ էության բացառում է անվճար (pro bono) իրավաբանական օգնության տրամադրման հնարավորությունը փաստաբանական կազմակերպությունների կողմից.

- շեշտակի ավելացնում է փաստաբանական ծառայությունների արժեքը՝ սահմանափակելով իրավաբանական օգնության հասանելիությունը, մատչելիությունը և դատական պաշտպանության իրացման հնարավորությունը.

- չնախատեսված էական ֆինանսական բեռ է առաջացնում անհատ փաստաբանների և փաստաբանական կազմակերպությունների համար, որոնք պետք է շարունակեն իրավաբանական օգնություն տրամադրել արդեն իսկ կնքված պայմանագրերի շրջանակներում՝ վճարելով 6-8 անգամ ավելի բարձր հարկ, քան սահմանված է եղել պայմանագրերի կնքման պահին գործող օրենսդրությամբ.

- հանգեցնում է խտրական պայմանների ֆիզիկական անձ քաղաքացիների համար, քանի որ ի տարբերություն ԱԱՀ վճարող առևտրային կազմակերպությունների, քաղաքացիներին մատուցվող փաստաբանական ծառայությունների արժեքը 20 տոկոսով բարձր է.

- լրացուցիչ ծանրաբեռնում է փաստաբանների աշխատանքը, ինչպես նաև լրացուցիչ ծախսերի առիթ դառնում՝ ավելի բարձրարժեք հաշվապահական ծառայություններից օգտվելու պարտադիր անհրաժեշտություն ստեղծելով.

- սահմանափակում է փաստաբանական ինստիտուտի զարգացման հնարավորությունը՝ ակնհայտ դժվարացնելով նորաստեղծ փաստաբանական գրասենյակների կազմավորումը՝ պայմանավորված ծանր հարկային բեռով.

- խտրական պայմաններ է ստեղծում փաստաբանական գործունեություն իրականացնողների համար ի տարբերություն տնտեսության այլ բնագավառների, որտեղ կիրառվում են հարկային արտոնյալ պայմաններ.

- խտրական է փաստաբանների և փաստաբանի արտոնագիր չունեցող իրավաբանների կողմից մատուցվող միևնույն՝ իրավաբանական (ոչ փաստաբանական) ծառայությունների հարկման առումով, քանի որ միևնույն գործունեությունը (նույն հարկման օբյեկտը) փաստաբանների մասով հարկվում է բազմապատիկ անգամ ավելի (հարկում ըստ սուբյեկտի, այլ ոչ թե օբյեկտի)՝ տանելով նաև պետության կողմից անհավասար մրցակցային պայմանների՝ ի վնաս փաստաբանների.

- խտրական մոտեցում է ստեղծում պետության կողմից Սահմանադրությամբ պաշտպանվող իրավաբանական օգնության իրավունքի և կրթության և առողջության

պահպանման իրավունքների միջև: Վերջիններիս տրամադրելով ԱԱՀ-ից ազատված լինելու հնարավորություն, պետությունը ոչ միայն խտրական վերաբերմունք է դրսևորում Սահմանադրությամբ ամրագրված իրավաբանական օգնության իրավունքի նկատմամբ, այլև՝ արհեստականորեն սահմանափակում է Սահմանադրությամբ երաշխավորված՝ անձի իրավաբանական օգնության իրավունքից օգտվելը.

2. **ԴԱՏԱՊԱՐՏՈՒՄ Է ԵՎ ԱՆԸՆԴՈՒՆԵԼԻ ՀԱՄԱՐՈՒՄ** իրավասու պետական մարմինների կողմից իրականացվող մարդու իրավունքների պաշտպանության համակարգը խաթարող և խտրական հարկային քաղաքականությունը փաստաբանական համայնքի նկատմամբ.

3. **ԿՈՉ Է ԱՆՈՒՄ** իրավասու պետական մարմիններին անհապաղ նախաձեռնել և իրականացնել խնդրահարույց օրենսդրական կարգավորումների փոփոխություններ՝ փաստաբանական գործունեությունը, անվճար (անհատույց) և կամավոր անհատույց իրավաբանական օգնության տրամադրումն ազատելով ավելացված արժեքի հարկից:

Հայաստանի Հանրապետության
փաստաբանների պալատի ընդհանուր ժողով